





二酉園詩集卷之三

沔陽陳文燭玉叔著

七言古

烏夜啼

春風一夜吹楊柳  
妾心斷絕君知否  
向來清夢到遼西  
啞啞啼聲驚不久  
停梭織錦有回文  
但言莫作征人婦

鸚鵡洲晚眺

鸚鵡之草何青青  
孤帆夜半洲邊停  
呼來一尊





倒明月醉中如見鸚鵡形臨流披讀鸚鵡賦禰衡之詞多怨訴當年險巇不足言風景依依江上樹可憐慧辨更無前可憐毛羽真天然豈知言語亦階亂付之鼎俎誰生全丈夫在名不在死黃祖老瞞俱已矣江夏何緣不畏名甘與曹家作奴使至今日暮煙波生大江曲抱武昌城城頭何人弄玉笛吹來片片梅花聲江頭花落渾飛雨持杯問之誰其主赤壁旌旗曾蔽空不及洲邊一撮土黃鶴仙人宛在樓仙才李白如重游天風浙浙洗洲去一滌人間鸚鵡愁

### 猛虎行

猛虎山中發長嘯白日深林暮當道黃犢無聲麋鹿遠磨牙撐腹雙眼耀五陵少年好射虎空向人前鏃白羽徘徊終是射石心走窺行跡日當午我聞九嶷有玉貧不攻倦來不憇三危峰饑時若從猛虎食三危九嶷無安容

### 行路難五言

君不見陌上塵乘風飄蕩隨人身從來將相弄



權柄賓客往往趨要津片言坐上有人光寵填街  
車馬如車輪一朝權去嘆零落翟家之門可羅  
雀多少悠悠行路心不如窮交重然諾

其二

君不見冰上霜表裏俱寒不久長繽紛競世亦  
何益人間岐路真羊腸阿房宮殿盛歌舞今日  
丘墟成草莽山鷄野雉棲其中纍纍高墳何足  
數浮生當酒且當歌莫令含嘆歸黃土

其三

君不見見枝頭花今朝滿地昨朝華漢家宮女見  
花愛建章宮裏花如霞拚花雨雨笑相語紅裝  
花枝亦可誇長信麗人感偏動自言不及朝陽  
寵年年對花今相思散聚翻憐花萬種

其四

君不見見河邊草春日青青冬日高紫塞從軍正  
少年白髮飄零忽已老故鄉迢遙天一方縱有  
音書不可到刁斗頻傳尚守關閨中思婦凋朱  
顏人言太行路誠險似此離憂那得還



其五

君不見平地水東西南北無定止人生有命俱  
自天富貴貧窮皆如此男兒萬事可並驩只愁  
歲月流如駛我今遭際在盛年何人意氣能相  
憐吞聲躑躅且勿嘆杖頭還有沽酒錢

秋夜長

秋夜長秋氣蕭蕭月如霜夜深展轉不能寐來  
從錦石擣流黃香杵紋砧聲遍響停砧四顧動  
遐想繡成鴛鴦本是雙仰觀鴻鴈都成兩一自  
良人戍萬里音書愁絕層城裏衣成不覺淚沾  
裳關山何日能逢使官家有衣聞有絮長短一  
身不可據飛夢迢迢夜未央願與寒衣一同去

隴頭吟

焉支山下多草色祁連山前畜蕃息將軍久慣  
識匈奴提兵直欲窮絕國夜深攬衣起狂走寶  
刀飛箭仍在手關山四望盡胡騎垂老回思曾  
奪取向來百戰總在身不見黃金懸左肘徘徊  
流涕幾沾裳隴頭羌笛堪白首



結交行

余過汴訪李川甫先生友人陳子壽作憶  
汴歌日占謝之

與君少年幾歌舞大梁北走非吾土明朝匹馬  
我何之去訪夷門李川甫臨岐起舞君更歌暫  
時分手情如何舉杯恰對嵩山月揚鞭欲挽黃  
河波千山萬嶺多遊冶七國爭雄戰盈野良將  
名藏屠肆間公子車停抱關者往事悠悠難具  
陳胡爲懷刺投荒城梁園雪賦自今古雪天訪

舊偏含情國朝詞賦論宗匠誰駕長風破高浪  
空同大復弘德間文采翩翩光萬丈當年同調  
有李生亳州君采會齊名薛何不作獻吉死此  
老高懸太白精詞場原是射鵬手含毫落筆千  
人掃五馬徘徊沔水陽太守風流重山斗少小  
同君未及門十年仰止仍乾坤君過滎澤我駐  
馬黃河之水日夜奔君才亦稱謫僊子能使香  
名滿人耳我當垂髫獨見君意氣相看不余鄙  
我家司馬解憐才玄亭奇字君頻來識君本是



青雲器遲君同上黃金臺黃金宮闕一指顧垂  
柳垂楊總瓊樹宮雲苑月春復深不獨秋風有  
良遇三楚聲華更一時九霄羽翮爭爲奇君還  
獨步我自後兩人交好誰能移人言陳雷久不  
逮結交之心千古在平生共羞仲產勳文章相  
許追先代茲行我見夷門翁論交憶爾應無窮  
長安陌上沽美酒看花並馬行將同

放歌行送三伯謁選時家大人守職方

男兒生不成名死且恨出門寧說君門遠一夜  
飛花沒馬蹄千里平郊草蔓蔓少年意氣不可  
當赤髭白皙何揚揚泣珠辨璧亦往事古來顛  
顛原瀟湘國風冲融比虞夏天子弓旌還在野  
防胡新築廣寧城運籌且屬吾司馬今行正值  
好春時玉缸花撲春偏宜五陵豪貴多相遇人  
生不飲將何爲殷勤更進杯中酒燕然之銘如  
在手謝家兄弟世所希阮氏才名我何有臨岐  
折贈新開柳

長安道



長安甲第如雲屯香車寶馬多豪門五侯七貴  
不足言市上但知丞相尊四方玉帛晝若奔夜  
半有人還扣關一朝天子震乾坤七尺之軀那  
得存今朝鈇鉞昨朝恩世事悠悠何可論

### 從軍行

漢家中興稱太平單于公然近京城承明殿前  
羽書急廣寧門外胡笳聲將軍練兵更招募虜  
友陰山使我戍鐵衣如雪更生寒夜半令人淚  
如雨偏裨聞道總封侯可憐白骨無人收游魂  
尚作閨中夢悽惻空添行伍愁年年甘老荒城  
下眼前誰是驅胡者所從若是李將軍不見胡  
兒來飲馬

### 將進酒

君不見東園桃李花春風一夜成泥沙又不見  
草頭露白日照之不及暮人生天地自沉浮杖  
頭之錢何必富請君手持金叵羅聽我擲地金  
聲歌古來高人多取醉我今不飲將如何伯倫  
酒德頌逾切杜陵雲安春在世小兒拍手習家



池吳姬壓酒金陵肆禪心逃處酒應熟草聖流  
傳正逢麴酒泉之封尚可移頭上之巾還可漉  
古人一日舒長嘯千載追思欲狂叫紫府丹砂  
總浪聞黃閣勳名空炳耀古人今人誰不死但  
願金尊甘且旨長鯨一吸巨浪中漢江原是高  
陽里

哀少婦

誰家少婦吞聲哭自言不見舊時屋去年胡虜  
犯京師驅我沙場同馬牧絕塞寒威不可當一

身無有完衣裳羶裘暫披亦不慣舉目迢迢非  
故鄉疾風揚塵忽中起蓬響嗚悲頻在耳哀響  
纏綿不敢呼胡兒穹廬時自徙四顧無人偶脫  
逃仰觀星月長城高望星拜月指歸路鴻鴈南  
征聲正號玉門關入追不及竄過荆棘湏臾立  
歸家夫婿已喪亡傍人見之都感泣夜深話舊  
淚不乾向來奔走何其難遺骸故土始得返愁  
見刀痕與箭瘢古人只言生女好惟有生男埋  
白草豈知生女逼匈奴縱嫁比鄰還遠道



哀江南

往年邊塞只防虜胡塵不敢飛中土豈念今年  
又備倭海南烽火胡能禦颶風蕭蕭發島洋戰  
船千艘維孤嶼武夷山下集黃雲會稽城內飛  
白羽姑蘇夜半少行人西湖一旦休歌舞甌越  
頻年已不堪淮揚今日兵尤苦眼前城郭化爲  
墟那說金錢與兒女廟堂懸賞示封侯黃金徵  
調幾寰宇我聞聖人在上海不波日本胡爲有  
弓弩長纓得請是何人一壘江天淚如雨

觀王右丞維滄洲圖歌得峰字

右丞一去已千載右丞妙手還崔磊人間已忽  
訝十洲壁上不合懸江海石林赤日渺孤峰桃  
花亂落武陵封當年避秦疑此地深谿遠澗尋  
僊踪僊踪隱隱不可見筆底煙霞猶散卷山光  
藹藹近人飛水勢潺潺當座濺維也維也今有  
無披圖玩之終模糊安得坐我朝川上丹青與  
爾同招呼

雨中懷江上草堂兼柬包元夫計曹蕭文



明比部

帝京宮闕非吾土家山一別經年五晝夢迢迢  
青草湖覺來唧唧黃梅雨雨聲似到胡床語結  
茅爾在江之渚亭榭丹梯總是春陂塘六月疑  
無暑萬竿寒玉煙雲裏七澤遊魚有新美白水  
波深負郭田烏皮濕盡看山几看山今向天涯  
陌簿書堆案胡相迫歲月空慚楊子玄煙霞久  
負羅含宅四顧發狂欲大叫折簡那能來二妙  
千絲萬絲雨不如滑滑塗泥更誰道青山澤國  
渺難度咫尺同心亦異處沾得清尊遲爾來涼  
風吹動簷前樹

送李老甫太僕還四明

木葉蕭蕭下城闕美人別我還吳越放舸晴牽  
日暮雲停杯欲問青天月寒雲涼月解隨人一  
言投合偏相親河橋且繫紫騮馬朔風吹動白  
綸巾故山遙指東溟渤鴈蕩天台何峯屺問君  
職掌十二閑何人更愛千金骨渥洼奇種亦無  
媒負轅俛仰鳴長哀古來神識今安在秋深草



沒黃金臺丈夫遇合皆如此眼底浮名竟誰是  
江行白也有新詩鴻鴈肯寄長安市

陳維錫太史夜過席上得明字酒酣遂成  
長短句

空庭木落風亂鳴故人訪我歡相迎甕頭酒盡  
話不盡冉冉浮生誰令名片心恰似城頭月夜  
深還向城頭明彩筆生花何太喜劍光忽傍燈  
前紫太行峒嶢北斗寒故人勲業還如此天涯  
青眼望高歌眼中之人吾與爾

天台行送邵司訓之寧海

天台秀插何其高倒影凌空駕海濤赤城霞標  
擁萬丈寒泉瀑布飛千條穹隆懸磴真堪仰滑  
石莓苔光欲朗扶桑曉日照天門靈溪一濯疏  
煩想海上蓬萊路幾重波浮鴈蕩聲淙淙誰言  
絕島少禋祀山光皎潔無登封煙雲縹緲掛晴  
樹瑤草紫芝還可遇空說當年劉阮遊壁間剝  
蝕孫公賦君今秉鐸之四明談經散帙多餘清  
披榛捫蘿時一上振衣况復同諸生君家科第



且屢世杭州巴蜀仍相繼揮毫更有祠部公秘  
閣淋漓會應制羨爾真能讀父書守玄高卧江  
之墟北來雪花大如斗河梁立雪增躊躇悠悠  
車馬總寒色送送音書定相憶官衙只喜近青  
山勲名何必燕然勒試問山頭若箇峰側身住  
目生長風向平婚嫁若待了盧敖之杖翻成空  
若行且作天台客爲余先買登山屐摧眉折腰  
我不能遠心欲煮天台石

西華行寄懷曾以三督學

我聞太白之精墮地五千丈巨靈咆哮分爲兩  
諸峰崿嶸似兒孫中間割出僊人掌僊人今去  
幾千年芙蓉清露還飄然丹崖翠壁迥若畫玄  
圃瑤房如在前箭括通天手欲摩車箱谷口差  
能過悲風蕭蕭動石榻羊公子先今如何黃河  
萬里從東來搔管青天眞壯哉洪濤一線杯可  
吸盤渦轂轉聲如雷當年我夢登其上二儀浩  
蕩將焉往覺來枕席尚煙霞九節惟餘舊時杖  
吾鄉曾子才且雄天書遙下蓬萊宮作人已見



追大復雄詞直欲排崆峒有時振衣絕頂處含  
毫洗卮驅玉女飛揚御日覽八極區區拳石真  
鳥鼠雲臺決漭亦增容明星萬點羅其曾揮鞭  
西極盡天馬更叱茅狗爲蒼龍都亭別去兩三  
歲故人風流若把袂平生意氣共嶙峋爲我真  
源問白帝身游不與夢中同那能羽翼飛晴空  
古來李白登此憶謝眺胡不與爾醉倒蓮花第  
一峰

己巳除夕擬杜七歌

有客有客在長安承明委珮聲珊珊誰言清朝  
已刑措仰看時事心猶寒縱飲斗酒不成歡五  
年未歸江之干嗚乎一歌兮歌未闌悠悠人間  
行路難

其二

有父有父在高堂運籌曾作尚書郎旌旗曉度  
飛狐口至今勲業遺邊疆山中題詠歸錦囊安  
得置我于其傍嗚乎二歌兮歌欲狂寒燈熒熒  
夜未央



其三

有母有母已下世當年生我禱玄帝少讀女史  
并諸書教兒不獨工文藝九載于今憶長逝黯  
黯浮雲獨含涕嗚乎三歌兮歌始劇悲風慘慘  
來天際

其四

有兄有兄富文藻平生怡怡情自好羽毛更得  
兩鳳雛好向雲霄致身早幾年不共話懷抱江  
市戎戎令人老嗚乎四歌兮歌愈浩池塘夜夜

生春草

其五

有兒有兒學我步大者讀書小能句手攜爾妹  
總成行婚嫁何時畢良遇浮生萬感泣岐路柏  
葉椒花仍歲暮嗚乎五歌兮歌屢度沉沉玉漏  
依宮樹

其六

有友有友各一方欲往從之河無梁已知生別  
常惻惻惟有死別牽我腸時有子雲伯現之感石流泯泯



還故鄉相思誰寄鯉魚長鳴乎六歌兮歌正揚  
新月纖纖度女牆

其七

吁嗟我年三十五低頭奔走空塵土按劍無緣  
附鳳凰揮毫不敢驕鸚鵡欲取瑤琴試一鼓絕  
調知音自今古嗚乎七歌兮歌獨苦喔喔鷄鳴  
頻起舞

送郭承芳僉憲河南

長安十月驚寒早長安一尊聊醉倒故人繡斧

惠文冠乘輅南去夷門道若年三十趨明光袖  
中詞賦獻長楊公家屢朝皆賜第列卿御史尚  
書郎自言出身報明主柱下英聲紹爾祖一官  
卽得理冤民幾廻落日西亭樹亭中懷抱向誰  
開燕歌郢曲相追陪雄篇楚楚青玉案片心矯  
矯黃金臺三花遙指迂旌節九曲回看心共折  
攬轡還清少室雲操觚且賦梁園雪梁園往事  
那可論銅駝金谷隨灰塵荒城風物總蕭瑟憐  
才弔古空愁人朔方昨夜傳刁斗馬渡交河南



牧久漁陽壯士慘不驕誰取賢王懸左肘君今  
驅馬洛陽城洛陽古來多才名請君雄劍一指  
顧好向中原洗甲兵

梁舍人思伯寫見南江閣圖書寄大人燭  
爲短歌附之

復州自昔雲夢野一線澄江向東瀉歸去幽人  
坐讀書中結樓臺俯長夏樓西纍纍又朱闌城  
頭隱隱皆青巒綺寮似對赤館頂飛除欲掛烏  
林湔黃金爐鼎已百煉玄經草帙還千卷蘭茝

重歌澤畔吟柴桑只喜南山面有時天雨忽新  
晴崇丘疊嶂瀆史成空中殿宇列萬狀雲開樹  
洗沙爲城天峰吹墮青霄外眞宰從來有明昧  
海市如何忽上江悠然見之與心會嶺南梁子  
鳳凰雛結交司馬曾驩娛懷人似欲度湘水酒  
酣亂點雲山圖披之如對昨年景席上淋漓動  
光罔蕭然那得坐其中望望家山繫長頸

出塞行別楊參軍之大寧

男兒七尺當封侯千金買馬裝刀頭  
次君本是



良家子腰間仍帶雙吳鈞  
洹河水落胡塵起  
滹沱冰合官軍止  
朔風淡淡擁平沙  
白日蕭蕭寒  
易水東指遼陽西  
大同紫荆光  
近甘泉宮隴頭  
雲卷似列陣  
關山月渺如懸弓  
毛席葺壘  
須臾集虎夫  
魚甲齊聲立  
笑取賢王可繫來  
往見將軍  
只長揖將軍誰是霍嫖姚  
決勝帷中還爾曹  
揮之沙漠如脫兔  
可令秋高來射鵬  
君不見淮陰萬戶稱不朽  
跨下少年何足醜  
登壇一軍驚  
且走漢家四百皆在手  
戰場赤幟尚可尋  
請君

試度飛狐口

虛舟歌寄懷鄭山人中伯兼詢謝茂秦消息

丈夫高視卑乾坤  
曳裾瓠落多王門  
片言投合卽知己  
黃金結交安足論  
我聞趙王昔好士  
賢豪千里如雲至  
鄴下應徐再見之  
梁苑鄒枚亦不啻  
就中更有謝生才  
鄭也遠自東吳來  
清流不共濁漳水  
染翰時登銅雀臺  
大鵬遙徙南溟  
翻雕龍更仗談天力  
已知明珠照千里  
况逢光



寵投雙璧平原往事難重陳一時聚散如飄塵  
泰山東望有谷口日觀之峰何嶙峋羨君意氣  
復如此湖海卜居聊復止踈達惟宜竿仲過安  
貧羞作鴟夷子黃鵠摩天事遠遊笑看天地原  
虛舟如何竹素老不倦風晨雨夕燈猶篝江山  
滿日多兵燹筆底煙雲差足遣去年寄我尺素  
書高誼翩翩知不淺藜杖綸巾何可尋燕齊朋  
侶誰知心薦君不能慚狗監知君聲價還雞林  
悠悠世路多齟齬冉冉浮生真逆旅玄暉高調  
與爾同謝生謝生在何許

淮河行送高郡判東歸

淮河城邊日將暮淮河舟邊葉如雨客子秋深  
思欲悲况別同心在岐路同心擊汰何所之悠  
悠將返瑯琊涯齊魯一壘青未了嗟哉世事如  
奕棊往年秉鐸在六館石鼓遺文續其斷英英  
少俊總在門遣子匈奴亦納款承明出入有光  
輝天子臨雍曾賜衣胡爲遠作淮南吏催科日  
與心相違淮南凋敝如可掬二月新穀五月穀



誰道瘡痍還可醫骨皮不見心頭內  
擬君向我攢雙眉回思逋賦完何時  
泱泱誰流復再淦嗷嗷黔首空其咨  
馮夷欲遣無奇策如何忽動煙霞癖  
世事都消北海杯閑情好着登山屐  
君家崑崙泰山東石間玉几臨長空  
寒雲忽傍秦松外奇字多存漢禪中  
尊前有酒且復盡白首交情亦堪憫  
臨風對鼓猗蘭操遏雲彈出箜篌引  
浮名我亦輕羽翰尊鱸况在江之干  
請君爲掃天孫石若箇峰頭好挂冠  
今日歌聲淮水寒

醉後別管山人

蕭蕭疎雨落長陌故人維舟行且迫  
岸頭有酒正如淮斟酌紅光搖琥珀  
丈夫自古多貧窮黃金揮之如瓦石  
馮紹張藻似尚存畫圖往往垂竹帛  
醉中分手一無言醒後何人話干鬲  
平生只有糟丘癖茲行正過濟寧樓  
爲我丹青肖太白

黃金臺歌寄大兄北試兼懷孟以賢

昭王當日築高臺驂騮駁裏紛然來  
苑丘西極



不足推駿尾蕭梢走海隈千秋往事空蒿萊于  
今明主方愛才金馬之門仍正關吾兄骨相  
本龍媒一日千里何壯哉故人意氣非塵埃故  
人神駿非凡胎登高四顧共徘徊天風吹動秋  
霜皚

宿太嶽絕頂夢中成長短句

太嶽之山何其高長江一線飛洪濤纖纖明月  
真可拾浩歌一曲仍持螯吾家杖屨挂雲樹冉  
冉流光三十五嘉靖丙申家大疎薄誰言嶽降

神今日重過頻起舞青童兩雨何處來雲鬟素  
手相徘徊謂我玉皇香案吏遺我一二流霞杯  
希夷練脩有遺礎神女解珮如可語飛揚不在  
宇宙間十洲三島非延佇呼吸真如帝座通高  
標浩蕩摩長空白雲在下衆山小意氣泠泠思  
御風嗟余本有山川癖遙向青冥拜奇石林猿  
野鶴總堪題獨少僊才李太白

匡山行贈李子少白

我聞李白多好奇金陵酒肆揮新詩五侯七貴



亦共酌氣岸凌人不可羈采石江寒飛白雪才  
情流水俱不歇舉頭已碎黃鶴樓持杯更問青  
天月月華樓閣迥千秋白也白也翻僊遊我亦  
平生百觴醉恨不相逢鸚鵡洲吾鄉李子稱希  
白紅顏綠鬢糟丘癖臨池工逼晉時書成詩頗  
解唐初格煙霞林莽意相親名山到處思逡巡  
有時出門忽大笑自言不是蓬蒿人吾家司馬  
憐才者問字時時走亭下去年曾作頭陀碑寒  
陵片石煩君寫興來與爾酣江樓清尊消却千  
年愁眼中識人亦不少於今誰是韓荊州李生  
李生醉且去匡山還有讀書處散髮何年結勝  
遊暮雲長挂青天樹

過黃河投弔李川甫先生

夜來陌上多風雨曉起平明出長路褰帷遙見  
太行山驅車且向黃河渡河流新水發桃花河  
邊游絲挂晴樹龍門一派何壯哉千古寒濤只  
東注懷人心事共悠悠腸斷梁園幾朝暮當年  
匹馬夷門道景延堂上關懷抱昭代文章數李



何嵩少齊名爾亦好尊酒平原正有期鄰笛山  
陽令人惱丈夫自古愛榮名富貴豪華安可保  
河神飛夢爾之傍白楊蕭蕭暮宿草

解五嶽圖贈少林寺僧洪川廣令歌

夜坐不厭山中月晝行不厭山中雲雲飛月落  
興無盡披圖指點岡巒分此圖真形號最古天  
壤名山惟有五芙蓉日觀在東南蓮花僊掌開  
西土太行峨峨碧玉間一到嵩丘是中宇携來  
傍我亦有年何人贈之郭次甫高僧况是惠遠  
流卜居他日能爲主好勒磨崖第一峰寒林夜  
半生風雨

明妃村

我過明妃村前有明妃墓荒臺芳草自青青一  
逐胡塵那復顧美人俊骨已不存後人爲之永  
哀慕可憐顏色不足驕可憐恩寵無常遇秋來  
霜白月更明悲風蕭蕭如怨訴假令當年老漢  
宮長信流光亦易度何得佳名今遠布最恨君  
門萬里長斜陽佇立荆門路



南叔後憲使召飲望峨亭以雪入不果游  
成長短句

明月滿江干峨眉雪未殘月華與雪艷照我衣  
裳寒如何到此說去住徙倚空門日將暮磷磷  
白石在青天翠黛雲鬟挂江樹關西才子約我  
遊明珠片片仍相投未能冒雪到絕頂一愛名  
山經幾秋頽陀更指岑公碣今古豪華總消歇  
明年三月峨眉青與君重醉峨眉月

酬山人王寅見懷兼以招之

仲房仲房爾在何方高歌懷我江之鄉爾稱十  
嶽我稱五四宗之外何須數向禽兩人有同好  
惟我與爾追千古我非宦遊爾非阨名山煙月  
聊同適峨眉絕頂我亦游杖藜定有茲山癖眼  
前倒屣當是誰漢家王符一縫掖

寄懷孫山人兆孺時訪王元美中丞

之子一葉舟曾繫淮陰市結社大河邊悲歌中  
夜起然諾重千金散髮垂兩耳一歸洞庭山聞  
到鄭西里鄭西主人王仲宣坐中君亦孫文始



賦得青城山歌送王召之憲使入賀

蜀山萬點青天出指點青城山第一自古傳爲  
七洞天蒼翠陰陰造化窟瓦屋遙連碧雲落雪  
山咫尺寒光薄唐人錢起亦作歌更壓峨眉吞  
劍閣僊家都會舒長嘯秦漢封禪都不到公家  
逸少最好奇夢回汶嶺恣登眺惟君手持綠玉  
杖少年身致雲霄上學海淵源讀父書筆走風  
雷驚哲匠杜陵李白久云沒千載聲華同突兀  
觴更滌浣花溪振衣直探峨眉山月愛山我亦

同君癖年來汗漫登山屐臨岐遙望青城峰煙  
霧蓬萊生几席青城似濯芙蓉水靈關爲門包  
玉壘符采垂天茂八區故人曾次原如此故人  
本是金閨彥馳驅走謁明光殿先朝柱下有直  
聲 聖主當陽財一見此去關河路浩蕩華嵩  
之間雲莽莽少林鐘磬欲浮衣蓮花僊露歸其  
掌別君知君應憶我世上交游空瑣瑣雪夜玉  
猷定放舟壁間塵榻吾虛左命舟下榻還難卜  
故人青山時在目好采嵩雲更入呼 遜臣更有



岡陵祝

西征篇有序

嘉靖乙巳表叔傅公督學于蜀作西征篇  
時爲南戶部尚書書示不肖次韻寄懷愧  
詞不逮云

我來巴蜀萬里相將誰言秦時樓觀在青天之  
上皆封疆爰自沔水直走華陽雖有西南齊魯  
之化終爲蠶叢魚鳧之鄉三廻巴水曲成字瞿  
塘象馬令人傷朝雲暮雨道路悠長捫參歷井

俛仰何當猿猱挂樹杜鵑啼亡音衣洋瀆江少  
舟航嚴遵卜市久不見子雲玄草非其常明星  
夜晦白日晝黃西望雪嶺飛駕石梁峨眉八十  
四盤險曬經瓦屋相爲頗馳驅我亦登其上側  
身南望白雲揚經羊腸之九折感叱馭兮王郎  
况音書之稀阻憶杜甫之沾裳古人正愁絕中  
心愴以商梁山劍閣浣花草堂鄉思牢落奔走  
不遑高篇縱橫憶往事夢回時到并州傍當年  
至教可裁簡狂嗟余薄伎踵芳躅講室石室胡



能忘西連弱水東斷扶桑勳名正協司宗夢畫  
圖空鎖王維庄

周公瑕爲余書浣花草亭碑寄謝

浣花溪頭數竿竹溪上誅茅數椽屋故人爲我  
題豐碑故人草聖真堪讀平生飄零憶杜甫感  
慨論文仍弔古百花吹散溪水紅參天獨樹經  
風雨鳥鳴高枝月滿地似共山靈愛碑字徘徊  
若問草堂賢可嗔當年王錄事

飲陳于韶憲使卧雲樓醉賦

故人樓閣中天起簾捲東西列圖史一片嘉陵  
入座清萬竿竹樹當筵紫故人邀我醉樓頭亭  
亭江雲如蓋浮閬州佳麗自今古平生况愛名  
山遊名山名園真咫尺玉臺觀碧靈山白門外  
安車久候迎煙霞到手寧輕擲憶昔嘉靖庚戌  
年吾家司馬曾相憐燕京酒人間海內至今詞  
賦傳翩翩屈指盛名只數子君才磊落誰能比  
今夜相逢一縱談同心世誼悲歌裏悲歌不獨  
爲論文世事翻覆同飄雲從龍觸石聊成卧蘆



花楓葉秋紛紛倚檻雲容有時黑似爲吾徒供  
翰墨祥光隱見灑四溟秀氣參差垂五色怪得  
家聲說子昂高篇感遇名何長平頭奴子夜沽  
酒問之猶是射洪香射洪園中堪步武讀書臺  
畔今誰主對酒當歌雲亂飛醉中恍惚吟天姥  
吟成珠玉滿座驚欲別不別仍含情夜深星斗  
下樓去空蒙霖雨還蒼生

### 大峨眉行

我聞軒轅黃帝訪道峨眉巔天眞之語至今傳

周時葛由有僊骨刻羊曾到綏山前綏山一桃  
眞足貴綏山三景那能繫純陽真人吹洞簫野  
鶴翩翩下清唳鶴鳴鳳翼共徘徊煙花萬樹空  
高臺濟師琴韻久不作楚狂之名還崔嵬君平  
不謂三峨小佐理名山見山曉黑水白環晉慧  
通牛心丹鼎孫思邈孤峰落日火不煙雙橋流  
水聲潺潺白雲正被希夷卧明月應來李謫僊  
古人都愛峨山好月明誰在開懷抱娑羅樹上  
多奇花寶蓋坪前有瑤草西域曾聞千歲僧巨



靈一劈天門升從來震旦此第一菩薩之石光  
六稜稜光閃爍幾千變更走風雷銅鐵殿鼯鼠  
成羣不避人神鳥高鳴報佛現夜半巖頭吐聖  
燈平蕪一照飛千層普賢大士涉彼岸辟支坐  
遣山靈應山靈自昔稱南戒雪山一帶渾如畫  
曬經火焰宛相連數點蒼蒼銀世界與因峨山  
饒且作峨山謠仰窺天路財咫尺雲中法駕如  
相邀天門可仰不可上欲叩盧敖與向長天山  
一色正微茫誰說峨眉之高幾十丈

送高敏甫檢討北上兼寄陳仁甫宮贊

春來百花飛滿路故人遙向瀛洲去太液波光  
玉案通夜深猶見金蓮吐金門出入誰更好高  
適陳琳共懷抱尊酒憐余萬里橋從來蜀道音  
書少芳草斜陽一送君千山萬山青未了

酬謝山人茂秦見寄之作用原韻

青天萬里連雲樹故人書自漳河路七子中原  
爾竝名建安不說應徐賦書中獨憶浣花溪浣  
溪誰似驚人句甫也東西南北人喪亂兵戈此



流寓數椽茅屋今尚存  
夜半秋風聽如訴  
澄江一檻俯乾坤  
橙林千丈經風露  
故人千秋亦落魄  
出門曾作長安客  
固窮肯受將軍憐  
問奇屢過高人宅  
側身天地皆重回  
甘老風塵髮盡白  
工部文章不浪傳  
一飯寧忘唐社稷  
高歌弔古夕陽斜  
太平今日無兵革  
亭前花鳥莫深愁  
我今漫興還虛石  
故人杖履倘來過  
雪山石鏡情何極

瀚臺雲馭歌 有序

中丞羅公撫蜀巡川之南有箕僊筆甚奇  
贈公別號書瀚臺雲馭公翩翩有僊氣  
命燭紀其事因系之以歌

君不見周時王子晉  
嵩丘振衣千萬仞  
一夕吹笙作鳳鳴  
俯視塵寰同尺寸  
又不見唐時李太白  
平生最有懷僊癖  
蓬萊頂上思雲行  
二山呼來供几席  
三山何處最高峰  
往往神遊八極中  
鞭雷弄電不輟手  
更叱茅狗爲蒼龍  
羅夫子古來豪傑俱如此  
遐齡幾見變桑田  
遠心還欲食



石髓金銀宮闕歸瀚海投贈丹砂雅相待不但  
文章光陸離不但勲名垂鼎鼐海氣雲容半有  
無此圖揮出真靈符青城主人發長嘯三十六  
洞吾其徒

寶劍歌送羅一化少叅之滇南

送君陌上春華好看君寶刀發孤嘯自言佩之  
三十年飛揚不說風胡巧陸行犀革剗在手水  
行直令蛟龍走有時流綺藏匣中有時長虹貫  
北斗周旋八閩與三楚倚天騰電誰爲侶赤董

昆吳亦浪傳駿馬名都不輕與携來七蜀仍破  
敵九絲絕塞聲霹靂方知太阿偶一鳴青城赤  
甲無兵檄關河迢迢今萬里臨岐把酒悲歌起  
昆明點蒼天下奇劍氣光芒拂衣紫丈夫舒卷  
歸長鋏碧鷄金馬還如昔腰間鋒鏑利新霜定  
使勲名垂竹帛

圭兒北上應試歌以送之

黃金闕黃金絡叱馭登臺爾勿薄君王正坐延  
英閣濯龍飛鳳多噴玉溼漑神品那能却何人



更是皇人毅長安陌上有伯樂東風一日長安陌

紫宸宣對歌爲管建初賦

長安飛雪雪初霽江海孤臣來謁帝管生乍見  
翻作驚咄咄冠裳有遭際憶昔談天碣石宮布  
衣往往工文藝嶺南梁子黎秘書生也逢之比  
蘭蕙相從過我草玄齋和墨含毫雅相契虎頭  
玄壁若再新薛稷青田還不啻周遊八極淮水  
頭大山小山賦堪愛閣名無卧榻自懸亭開招

隱爲誰計太守清貧生更憐斗酒良宵幾沉醉  
夢魂只在山水間解携尚記煙霞袂煙霞何意  
遇明王畫家獨許看前輩上方給札內使傳武  
英殿前欲面試小臣叩頭不敢言偏袒右肩膝  
着地鵝溪絹拂赤水流橐簪聿就方壺出咫尺  
應須萬里論墨花飛動宮雲靄天顏有喜逾近  
傍大官珍膳遙相遍中書舍人秩最清牙綬相  
將易羅薛宋昌曾寫高士圖立本亦像功臣位  
從來妙技重巖郎一日風雲便千載管生管生



遇太奇金馬之門聊避世


池口驛書懷

江濤正如吼江雨復如注  
上有齊山之春草下有秋浦之古樹  
我向池人間路岐徽州迢遞不可渡  
兒女咫尺不相顧黃鸝恰恰聲如暮  
振衣起坐不堪聞何況啼猿斷腸處

小孤山歌寄廖子占大尹

小孤山下風波小小孤山頭月華好  
故人鳴琴坐山曉幽蘭別鶴聲渺渺  
欲往從之隔遠道





原件短缺

P32



